



**Komunikadu Imprensa**  
**Munisípiu Covalima**  
**27 Feveireiru 2024**

### **JSMP haluan Programa Apoiu Seguransa Komunitáriu (PASK) iha Suku Maudemu**

Iha 20 Feveireiru 2024, JSMP realiza seremónia asina Nota Entendimentu (MoU) ho autóridade Suku Maudemu, Posto Administrativu Tilomar, Munisípiu Covalima ba períodu fulan neen iha tinan 2024.

“JSMP agradese tebes ba xefe Suku Maudemu ho estrutura tomak ne’ebé hakarak kolabora ho JSMP ba implementasaun Programa Apoiu Seguransa Komunitáriu iha Suku Maudemu, JSMP konsidera programa ne’e importante tebes, tanba antes ne’e JSMP konsege implementa ona projeitu ne’e ho suku balun no hosi serbisu hamutuk ne’e prodús rezultadu balun ne’ebé bele ajuda ona comunidade sira liuliu kona-ba revizaun ba iha regra tara bandu no comunidade sira iha ona koñesimentu ba sira ninia kazu ne’ebé prosesu iha justisa formál no ninia lala’ok sira”, dehan Sra. Flora Soriano Menezes, Kordenadora Unidade Peskizadór Legál no Unidade Treinamentu no Advokasia JSMP.

Enkuantu, Administradór Postu Administrativu Tilomar, Sr. Venancio Sarmiento iha ninia intervensaun haktuir katak programa ne’ebé JSMP ho Suku Maudemu sei implementa ne’e nu’udar programa foun no importante ba iha comunidade sira, tanba durante ne’e comunidade sira hasoru hela problema no depoisde prosesu ba iha tribunál, comunidade sira la hatene kona-ba lala’ok hosi prosesu ne’e, nune’e husu ba xefe suku no konsellu suku sira atu serbisu hamutuk ho ekipa JSMP durante fulan neen (6) ba oin, tanba programa refere fó benefísiu ba comunidade liuliu bele hatene sira nia direitu asesu ba justisa formál.

Reprezentante Komandante Polísia Eskuadra Postu Tilomar, Sr. Agostinho Maia iha nia intervensaun haktuir katak nu’udar Ofisiál Polísia Suku (OPS) Maudemu sente orgulhu no kontente ho programa ne’e no prontu atu serbisu hamutuk ho ekipa JSMP durante fulan neen ba oin atu fasilita no apoiu comunidade sira iha Suku Maudemu liuliu oinsa atu asesu ba iha justisa formál no importante mak fornese formasaun no socializasaun ba comunidade sira tuir saida mak parte rua konkorda hamutuk ona, tanba comunidade barak maka seidak iha koñesimentu oinsa asesu ba justisa formál.

Alende ne’e, Xefe Suku Maudemu iha nia intervensaun haktuir katak nia parte kontente tebes ho prezensa JSMP nian iha ninia suku tanba bele apoiu comunidade sira asesu ba justisa formál tanba durante tinan 15 xefe suku nia ukun seidak iha ONG ka Instituisaun Estadu ida maka implementa programa hanesan JSMP halo ne’e, nune’e husu ba estrutura tomak atu koopera ho JSMP hodi realiza programa refere ho di’ak hodi benefísiu ba comunidade.

Programa ne'e ho nia objetivu mak atu tulun komunitáriu lokál sira no intervenente sira iha sistema justisa nasional hodi hadi'ak ligasaun entre sistema sira no mós hadi'ak justisa ida ne'ebé justu no ema hotu-hotu bele asesu iha nivel komunitáriu, ho atividade sira mak hanesan:

1. Observa prosesu rezolusaun disputa komunitáriu no hala'o peskiza lokál
2. Fornese informasaun hodi tulun halo revizaun ba iha Regra Tara-bandu
3. Fahe informasaun kona-ba progresu kazu sira hosi polisia tribunál, prokuradória ba iha suku sira tarjetu
4. Advokasia atu hadi'ak liután ligasaun komunitade sira ho justisa formál
5. Fahe informasaun kona-ba asesu ba sistema justisa formál
6. Sei introdus *Case Log* ba Konsellu suku sira no OPS kona-ba oinsa atu priense formulariu kazu sira

Seremónia asinatura Nota Entendimentu ne'e, JSMP representa hosi Kordenadora Unidade Peskizadór Legál no Unidade Treinamentu no Advokasia, Sra. Flora Soriano Menezes no Suku Maudemu representa hosi Xefe Suku, Sra. Maria Fátima.

Serimónia asina Nota Entendimentu ne'e, partisipa hosi Administradór Postu Administrativu Tilomar, Sr. Venancio Sarmento representante Komandante Eskuadra Tilomar, Sr. Agostinho Maia, Xefe Suku Maudemu, Sra. Maria Fátima no akompaña hosi Xefe Aldeia sira hosi Aldeia hitu (7), lia-nain, delegadu/a, representante juventude feto no mane, Mediadór Postu sira hosi Ministériu Interiór no jornalista sira.

Atividade ne'e realiza hosi JSMP liuhosi PASK tanba serbisu hamutuk ho The Asia Foundation (TAF) ne'ebé Finansia hosi Embaixada Nova Zelândia iha Timor-Leste.

Atu hetan informasaun kompleitu, favór kontaktu:

Ana Paula Marçal  
Diretora Ezekutiva JSMP  
Diresaun e-mail: [ana@jsmp.tl](mailto:ana@jsmp.tl)  
Telefone: (+670) 33238883 | 77040735  
Website: <https://jsmp.tl>  
[info@jsmp.tl](mailto:info@jsmp.tl)